修訂日期: 2004/11/14 發行日期: 2006/2/15

發行單位: 中華電子佛典協會 (CBETA) http://www.cbeta.org

資料底本: 大正新脩大正藏經 Vol. 34, No. 1726 原始資料: 蕭鎮國大德提供, 北美某大德提供

No. 1726 [cf. Nos. 262(25), 1727]

#### 觀音玄義卷上

### 隋天台智者大師說 門人灌頂記

夫法界圓融像無所像。真如清淨化無所化。雖像無所像無所而不像。化無所化無 所而不化。故無在無不在化應九道之身。處有不永寂入不二之旨。是以三業致請蒙脫 苦涯。四弘為誓使霑上樂。故娑婆世界受無畏之名。寶藏佛所稟觀音之目。已成種覺 號正法明。次當補處。稱為普光功德。其本迹若此寧可測知。方便隨緣趣舉一名耳。 今言觀世音者。西土正音名阿耶婆婁吉低輸。此言觀世音。能所圓融有無兼暢。照窮 正性察其本末故稱觀也。世音者是所觀之境也。萬像流動隔別不同。類音殊唱俱蒙離 苦。菩薩弘慈一時普救。皆令解脫故曰觀世音。此即境智雙舉能所合標。經者由義。 文理表發織成行者之心。故曰經。普門者普是遍義門曰能通。用一實相開十普門。無 所障閡故稱普門。品者類也義類相從故名為品也。大部既有五章明義。今品例為此釋 。五意者。一釋名。二出體。三明宗。四辯用。五教相。釋名為二。一通釋。二別釋 。通者人法合明。別者人法各辯。何故爾。緣有利鈍說有廣略。今就通釋為四。一列 名。二次第。三解釋。四料簡。一列名者十義以為通釋。所以者何。至理清淨無名無 相非法非人。過諸數量非一二三。但妙理虛通無名相中假名相說。故立無名之名假稱 人法。雖非數量亦論數量。故大論云。般若是一法佛說種種名。隨諸眾生類為之立異 字。今處中說。略用十義以釋通意也。十義者。一人法。二慈悲。三福慧。四真應。 五藥珠。六冥顯。七權實。八本迹。九緣了。十智斷。第二次第者。此有兩意。一約 觀明次第。二約教明次第。約觀則總初中後心因圓果滿。約教則該括漸頓小大諸經。 約觀以人法為初者。欲明觀行必有其人人必秉法。譬如人受一期果報攬陰成人。雖具 無量德行必先標名字。故以人法居初。意亦例此。人法居九義之初可爾。何意乘以人 法為次耶。此須據經。經云。以是因緣名觀世音。即前辯人。後云方便之力普門示現 。即却論於法人能秉法。故言人法也。二次慈悲者。良由觀音之人觀於實相普門之法 。達於非人非法實相之理。一切眾生亦復如是。故華嚴云。心佛及眾生是三無差別。 此理圓足無有缺減。云何眾生理具情迷顛倒苦惱。既觀是己即起慈悲誓拔苦與樂。是 故明慈悲也。

復次若就言說為便。初慈後悲。亦是就菩薩本懷欲大慈與樂。既不得樂次大悲拔苦。故初慈後悲。若從用次第者。初以大悲拔苦。後方以大慈與樂。又就行者先脫苦後蒙樂。故先悲後慈。今從前義次第也。三福慧者初則人法相成此據其信。次則慈悲

與拔者此明其願。欲滿此願必須修行。修行不出福慧慧即般若福即五度。互相資導以 行順願事理圓足。若智慧增明則大悲誓滿拔苦義成。若福德深厚則大慈誓滿與樂義成 。故福慧居三也。

復次言說為便。先福後慧。若化他本意先欲實慧利益。如其不堪方示福德。又資 故先福導故先慧。四真應者。若智慧轉明則契於法性。法性即實相名。為法身。法身 既顯能從真起應。真顯應起只由福慧開發。故次第四也。又若就方便化物。先用應後 用真。今從前義為次第也。五明藥珠二身者。先明真應。直語證得未涉利人。今明兩 身俱能益物。真身破取相諭如藥。應身對萬機類於珠。就兩字明次第者。與慈悲相似 也。六明冥顯者。前明二身道理即能顯益。今辯被緣得冥益或得顯益。故次二身後明 也。七明權實者。前緣得益何意不同。良由權巧無方赴機允當。不失其宜二智之力。 故以此為次也。先權後實者。此就淺深為次也。若依文者先以實益次以權度。此隨物 為次。若就佛本意。先只為一大事因緣。先顯實益。眾生未堪後用權度。八明本迹者 。雖復益物權實之巧。而巧有優降必是上中下智本迹之殊。權實略而且橫。今欲細判 高下以明次位。若其本高所作權實之迹則妙。是故次總略之後辯其細妙之能也。非本 無以垂迹故先明本。非迹無以顯本應先迹也。九明了因緣因者。上來行人發心修行從 因剋果。化他利物深淺不同。從人法至真應是自行次第。藥珠至本迹是化他次第。此 乃順論未是却討根本。今原其性德種子。若觀智之人悲心誓願。智慧莊嚴顯出真身。 皆是了因為種子。若是普門之法慈心誓願。福德莊嚴顯出應身者。皆是緣因為種子。 故次第九也。十明智斷者。前明緣了是却討因源。今明智斷是順論究竟。始則起自了 因終則菩提大智。始則起自緣因終則涅槃斷德。若入涅槃眾行休息。故居第十也。二 約諸教明次第者。又為通別。通義可解。別今當說。如華嚴頓教教名大方廣佛華嚴。 依題初明人法。此人秉法必具慈悲。菩薩修因居然福慧。既入地位必證真應。既能利 物則辯藥珠。物得其益有冥有顯。而未得別論權實本迹緣了智斷者。通義則有別意則 無。何故爾。佛一期化物明於頓漸。頓教雖說漸教未彰。故不明四意也。所以不明者 。彼經明小隔於大如聾如瘂。覆於此權未顯其實。故云久默斯要不務速說。故言無權 實也。言無本迹者。彼經未發王宮生身之迹。寂滅道場法身之迹。未彈指謦欬發久遠 所得生法二身之本。故言無本迹。言無緣了智斷者。不明小乘根性及有心之者。本自 有常住之因。當剋智斷菩提本果。故言無也。次約三藏教。但明人法慈悲福慧三義。 無真應等七種。何故爾。二乘教中但明灰身滅智。那得從真起應。既無真應將何益物 。私難。通論備十別語但三。此三若約真諦則隨通義乃具十意。何止但三。若言是別 。別應約中道。既得有中道人法三種。何意無七。私答。通論十意此約三乘。別語三 科的據菩薩。三藏菩薩得有慈悲福慧伏惑之義。既伏而不斷故無真應七法。師云。齊 教止三。若約方等教對小明大。得有中道大乘人法至冥顯兩益等六意。然猶帶方。便 調熟眾生。故不得說權實等四意。若明般若教。雖未會小乘之人。已會小法皆是摩訶 衍。但明人法等六意。亦帶方便未明權實等也。若約法華教則會小乘之人。汝實我子我實汝父。汝等所行是菩薩道。開權顯實發本顯迹。了義決定不相疑難。故知法華得明中道人法至本迹八意。前諸教所不明法華方說。故云未曾向人說如此事。今所說者即是今當為汝說最實事也。三世諸佛調熟眾生。大事因緣究竟圓滿備在法華。故二萬燈明但說法華息化入滅。迦葉如來亦復如是。若約涅槃。即有二種所謂利鈍。如身子之流皆於法華悟入。八義具足不待涅槃。若鈍根弟子於法華未悟者。更為此人却討源由。廣說緣了明三佛性。若論性德了因種子。修德即成般若。究竟即成智德菩提。性德緣因種子。修德成解脫斷德涅槃。若性德非緣非了即是正因。若修德成就。則是不縱不橫三點法身。故知涅槃所明。却說八法之始終成智斷。十義具足。此歷五味論十法次第。約四教則可解。故知十法收束觀教結撮始終。商略大意。何觀而不攝何教而不收。意氣宏遠義味深邃。前後有次第麁細不相違。以釋生起意也。

問。法華前教同有六意云何為異。

答。華嚴六意。於利人成醍醐於鈍人成乳。三藏中三意。於利人密去於鈍人成酪 。方等六意。於利人成醍醐於鈍人成生酥。般若六意。約利人成醍醐於鈍人成熟酥。 若法華八意。於鈍人成醍醐。第三解釋者。人即假名所成之人也。法即五陰能成之法 。此之人法通於凡聖。若色受想行識是凡鄙法。攬此法能成生死之人。戒定慧解脫解 脫知見。是出世法。攬此成出世聖人。故大論云。眾生無上者佛是。法無上者涅槃是 。雖通凡聖不無差別。上中下惡即成三途之人法。上中下善即成三善道之人法。故有 六趣階差。若更細論百千萬品。聖人人法亦復不同。若三藏有門。觀眾生我人如龜毛 兔角畢竟不可得。但有五陰之法。此即人空法不空。觀此法無常生滅不住。發生煖頂 等位。即是攬方便之法成似道賢人。若發真成聖生方便有餘土。攬法性色識等成彼土 行人。若空門明有實法之體。攬此實法得有假名之人。觀三假浮虛會入空平。煖頂即 攬方便法成似道賢人。若發真成無學生方便土。攬法性五陰成彼土行人。餘兩門人法 例此可知。摩訶衍中明人法者。亦不言人空法不空。亦不言體有假用。但觀假名陰入 等性本自空。故大品云。色性如我性我性如色性。始從初心終于後心。常觀人法俱空 。故大論云。菩薩常觀涅槃行道。以觀人空即是了因種子者。論云。眾生無上者佛是 。佛者即覺。覺是智慧。始覺人空終覺法空。故知觀人空是了因種也。觀法空是緣因 種者。大論云。法無上者涅槃是。以生死陰斷涅槃陰興。大經云。因滅是色獲得常色 。乃至識亦如是。大品云。菩薩行般若時得無等等色無等等受想行識。當知涅槃是無 上法也。攬此法成無上之眾生。號之為佛。故知觀法空是緣因種也。以觀人法空即識 三種佛性。故大經云。眾生佛性不即六法不離六法。不即者。此明正因佛性非陰非我 。非陰故非法。非我故非人。非人故非了。非陰故非緣。故言不即六法也。不離六法 者。不離眾生空而有了因不。離陰空而有緣因。故言不離六法也。佛從初發心觀人法 空。修三佛性。歷六即位成六即人法。今觀世音未是究竟之人法。即是分證之人法。

前一番問答是分釋無上之人稱觀世音。後一番問答分釋攬無上之法故稱普門。當知人法因緣故。故名觀世音普門也。二釋慈悲者。悲名愍傷慈名愛念。愍故拔苦念故與樂。菩薩若但起慈悲心不牢固。故須發弘誓加持使堅。譬如工匠造物節廨雖復相應若無膠漆則有零落。誓願如膠亦復如是。悲心愍傷。拔於世間苦集因果興兩誓願。所謂眾生無邊誓願度。煩惱無量誓願斷。此兩誓願從大悲心起。以慈愛故。欲與道滅出世因果之樂興兩誓願。所謂法門無邊誓願知。無上佛道誓願成。此兩誓願從大慈心起。但前明人法凡聖不同。今辯慈悲大小亦異。若三藏行人觀分段生老病死八苦即起誓願。眾生無邊誓願度。若觀分段顛倒結業而起誓願。煩惱無量誓願斷。欲令眾生觀此因果無常生滅念念流動。修於道品即起誓願。法門無量誓願知。若觀真諦無為之理即起誓願。無上佛道誓願成。如此慈悲緣有作四諦所起也。

復次通教觀老死八苦如幻如化。眾生顛倒謂為真實即起誓願。貪恚癡等如幻如化 。眾生顛倒為之受惱即起誓願。觀即色是空即識是空。即貪癡等是空。非色滅空色性 自空。空亦不可得。而眾生不能即色是空即起誓願。又觀涅槃若有一法過涅槃者我亦 說如幻化。而眾生謂有佛道。可求即起誓願。是約無生四諦起慈悲誓願也。別教觀假 名之法森羅萬象。應須分別導利眾生。那得沈空取證。觀此苦果非止一種即起誓願。 無量之苦由無量集。集既無量治亦無量。滅亦無量。如此誓願。緣界內外苦集因果無 量四諦而起誓願也。圓教觀法界圓融。本非違非順非明非闇無明闇故則違。違之則有 苦集因果。智慧明故則順。順之則有道滅因果。緣此違順因果而起慈悲。譬如磁石不 作心想任運吸鐵。今此慈悲不作眾生及以法想。任運拔苦與樂。故名無緣慈悲也。菩 薩從初發心修無緣慈悲歷六即位。今此觀音是分證慈悲。若前一番問答明無緣大悲拔 苦。一心稱名即得解脫。後一番問答從無緣大慈普門與樂。皆令得度。故知以大慈大 悲因緣故名觀世音普門也。三釋福慧者。亦名定慧。定名靜愛慧名觀策。大論云。定 愛慧策。寂照之智無幽不朗。如明鏡高堂。福德禪定純厚資發。如明燈淨油。亦稱為 目足備得入清涼池。池即涅槃。涅槃稱為二種莊嚴莊嚴法身。釋此定慧自有多種。三 藏以無常觀理為慧。以事中諸禪定為福。以定資慧發真無漏天然之理。名為法身。若 通教但以體法異於析法爾。若別教以緣修智慧與諸禪定。助開中道法身也。圓教以實 相觀為慧。實相寂定為福。共顯非定非慧之理。名實相法身。今圓教菩薩。從初發心 修此不二定慧歷於六即。觀音所以用智光照苦者。苦是顛倒迷惑所致。智慧是破惑之 法。故智慧能拔苦。華嚴云。又放光明名智慧。又放光明名無惱。思益亦然。請觀音 云。普放淨光明滅除癡闇瞑。故知前問答應機拔苦。是從慧莊嚴以得名。後問答住首 楞嚴普現色身。不起滅定現此威儀。安禪千偈讚諸法王。故知普門示現從福德受名。 良以福。慧因緣故名觀世音普門也。四釋真應者。真名不偽不動。應名稱適根緣。集 藏名身。若契實相不偽不動之理。即能稱機而應。譬如攬鏡像對即形。此之真應不得 相離。苦外道作意修通雖能變化。譬如瓦石光影不現。豈可以此為應。尚未破四住顯

偏真理。那忽有中道真應。若二乘變化修通所得此亦非應。譬如圖畫作意乃成了不相 似。大乘不爾。得實相真譬得明鏡。不須作意法界色像即對即應。如鏡寫像與真不殊 。是時乃名真寂身應。菩薩從初發心歷於六即。今經。前問答明於真寂而不動法界大 益。觀音從真身得名。後問答明隨機廣利出沒多端。普門是從應身得名。良以真應因 緣故。名觀世音普門也。五釋藥樹王身如意珠王身者。藥王療治苦患。出柰女經。珠 是如意之寶。廣歷諸教明治病得寶。今約圓教明者。如華嚴云。有上藥樹其根深入枝 葉四布。根莖枝葉皆能愈病。聞香觸身無不得益。菩薩亦如是。大悲熏身形聲利物名 大藥王。身又如如意。珠能雨大千珍寶隨意而不窮不。盡菩薩大慈熏身與眾生。樂名 如意珠王。身此亦約六即判位。就前問答遍救幽厄苦難。此從藥王身以得名。從後問 答稱適所求。雨實相雨得涅槃樂。此從如意珠王身以得名。故知二身因緣名觀世音普 門也。六釋冥顯兩益者。冥是冥密顯是彰露。大聖恒以二益利安一切。而眾生及以下 地日用不知。譬如日月照世。盲雖不見實荷深恩。故藥草喻云。而諸草木不覺不知只 同是一地。下品不知上品冥顯兩益。如文殊不知妙音神力所作。以不知故名為冥益。 此亦約六即判位。若就前問答。不見形聲密荷深祐。名為冥益。聖人之益雖不可知。 聖欲使知蜫蟲能知。如後問答親覩色身得聞說法。視聽彰灼法利顯然。故知觀音從冥 益得名。普門從顯益得名。以冥顯因緣故名觀世音普門也。七釋權實者。權是暫用實 非暫用。略言權實則有三種。一自行論權實。自觀中道為實二觀為權。二就化他論權 實。他根性不同。或說權為實說實為權。不可定判。但約他意以明權實也。三自行化 他合明權實者。若自觀三諦有權有實。皆名為實。化他隨緣亦有權有實。皆名為權。 用此三義歷四教。復就自行權實明六即判位。尋此品意是明自行化他論權實前。問答 從自行化他之實智益物後。問答從自行化他之權以益物。故知權實因緣故。名觀世音 普門也。八釋本迹者。本名實得迹名應現。若通途作本迹者。世智凡夫本意難測。乃 至別教本迹。若圓教無始發心。初破無明所得法身者名之為本。垂形百億高下不定稱 之為迹。若一往判真應。多用上地為真為本。下地為應為迹。地地傳作此判。真本唯 據於高應迹唯指於下。此義不可。今細明本迹則與真應異。本是實得。始坐道場及初 住所得法身即是其本。迹為上地之佛及作上地菩薩悉名為迹。不可以上。地高故稱之 為本。始得初住目之為迹。何以故。實不得上地上地非本。實得下地下地非迹。故壽 量云。隨自意隨他意。是本迹意也。就本迹明六即。就前問答不可說示。但冥祐前人 。從本地得名。後問答殊形異狀應現度脫。從迹地得名。故知本迹因緣故。名觀世音 普門也。九釋了因緣因者。了是顯發緣是資助。資助於了顯發法身。了者即是般若觀 智。亦名慧行正道智慧莊嚴。緣者即是解脫。行行助道福德莊嚴。大論云一人能耘一 人能種。種喻於緣耘喻於了。通論教教皆具緣了義。今正明圓教二種莊嚴之因。佛具 二種莊嚴之果。原此因果根本即是性德緣了也。此之性德本自有之非適今也。大經云 。一切諸法本性自空。亦用菩薩修習空故見諸法空。即了因種子本自有之。又云。一

切眾生皆有初地味禪。思益云。一切眾生即滅盡定。此即緣因種子本自有之。以此二 種方便修習漸漸增長。起於毫末得成修得合抱大樹。摩訶般若首楞嚴定。此一科不論 六即。但就根本性德義爾。前問答從了種受名。後問答從緣種受名。故知了因緣因。 故名觀世音普門也。十釋智斷者。通途意。智即有為功德滿。亦名圓淨涅槃言有為功 德者。即是因時智慧。有照用修成之義故稱有為。因雖無常而果是常。將因來名果故 言有為功德滿也。斷即無為功德滿。亦名解脫。亦名方便淨涅槃。言無為者。若小乘 但取煩惱滅無為斷。但離虛妄名為解脫。其實未得一切解脫。此乃無體之斷德也。大 乘是有體之斷。不取滅無為斷。但取隨所調伏眾生之處。惡不能染。縱任自在無有累 縛。名為斷德。指此名無為功德。故淨名云。不斷癡愛起諸明脫。又云。於諸見不動 而修三十七品。愛見為侍。亦名如來種。乃至五無間皆生解脫。無所染礙名為一切解 脫。即是斷德無為也。寂而常照即智德也。小乘灰身滅智。既其無身將何入生死。而 論調伏無礙無染。滅智何所照寂如此智斷圓極故法身顯著。即是三種佛性義圓也。法 身滿足即是非因非果正因滿。故云隱名如來藏顯名法身。雖非是因而名為正因。雖非 是果而名為法身。大經云。非因非果名佛性者。即是此正因佛性也。又云。是因非果 名為佛性者。此據性德緣了皆名為因也。又云。是果非因名佛性者。此據修德緣了皆 滿。了轉名般若緣轉名解脫。亦名菩提果。亦名大涅槃果。果皆稱為果也。佛性通於 因果不縱不橫。性德時三因不縱不橫果滿時名三德。故普賢觀云。大乘因者諸法實相 。大乘果者亦諸法實相。智德既滿湛然常照。隨機即應一時解脫。斷德處處調伏。皆 令得度。前問答從智德分滿受名。後問答從斷德分滿受名。故知以智斷因緣名觀世音 普門也。

問。此十義名字出餘經。那得用釋此品。

答。大乘義通眾經共用。若不許此者。佛性出涅槃。五住二死出勝鬘。諸師那得浪用通眾經耶。此品在文雖無十名。總將二問答帖十義意。宛然可解。今已如前。今更別點句句來證十義者。如文云。以何因緣名觀世音。又云。以是因緣名觀世音。即是據人名也。後文云普門示現即是明法也。有如是等大威神力多所饒益即慈也。愍諸四眾即悲也。欲知智在說。十九說法即智慧也。一時禮拜得無量無邊福德之利。即福德也。自在之業。即法身也。何故爾。法身於一切得自在。智慧契此故名為業。壽量云。慧光照無量久修業所得。威神之力巍巍如是。如是滿足之名。即是真身也。普門示現神通力。即應身也。遊諸國土度脫眾生。即藥樹王身也。於怖畏急難之中能施無畏。即如意珠王身也。福不唐捐即冥益也。三十三身即顯益也。現佛身即實智也。現餘身即權智也。觀音身即本餘身即迹也。又大威神力是本方便力是迹。聞是觀世音。菩薩名者若有聞是品者。即證了因。功德不少即緣因。不肯受常捨行故。及即時觀其音聲。觀即智。皆得解脫種種調伏眾生。八萬四千發心等。是利益即斷也。第四料簡者。

問。人對觀音法對普門者。方等有。普門法王子標於人名。此義云何同。

答。此應作四句分別。人非法法非人。人即法法即人。若約華嚴次第意地。前生死行人未是實相之法。此法亦非彼人。若作不次第意者。人即實相實相即人。人法不二也。若三藏有門明無假人但實法此法非人。若空門攬實法成假人。人法兩異。若其不離人論法不離法論人。此乃是二諦意非中道之人法也。若方等對小明大論人法者。明小同三藏明大同華嚴。般若涅槃等例爾。今方等中明普門者。即大乘意。今明普門是法。何得有法無人。彼明普門是人。何得但人無法。此則人法互舉。彼經標人此處標法爾。例如小乘明身子智慧第一。餘弟子各就餘法門論第一。本以智慧斷惑發真無漏。餘人無慧那得入道。既得道果果知有慧。但各舉其初門別稱第一。譬如刀刃斷物必藉於背方有利用。諸數如刀背慧數如刀刃。今普門義亦爾。但以因緣之法當普門之名。何得無了因之人耶。若併從觀音標名者。此則通漫。欲使世諦不亂互舉別名。如身具六根但稱為淨眼淨意。豈得無餘根耶。料簡慈悲者。

問。若大悲拔苦苦除即是得樂。大慈與樂樂至即是拔苦。何意兩分。

答。通論如此別則不然。譬如拔罪於獄。未施五塵身雖免痛根情未娛。此但拔苦未名與樂。又如施五塵於獄。耳眼雖悅不名拔苦。為從別義各顯一邊。故別說爾。

問。此中何意不論喜捨。

答。四無量心名雖有四但是三義。大經云。憂畢叉。畢叉名捨。捨者兩捨也。即是非慈非悲不二之意。不二而二即是慈悲。喜者。從樂生喜初欲與樂。眾生苦重不能得樂則無所可喜。若拔苦竟即能得樂。還遂本懷故樂後加喜。苦後無此故不開喜。如阿輸加王七日應死。雖有五欲之樂憂苦切心。又如一身少許痛惱能奪一身之樂。故知苦重不得樂也。

問。禪支明喜在前樂支在後。復云何。

答。禪支就從麁入細。此中慶彼得樂故喜心在後也。

復次外道修四無量自證禪定。作想虛運彼無實益。不能令他拔苦得樂。雖自獲定 虛妄世法。報盡還墮不免於苦。自他俱無利益。若二乘修四無量但自拔苦於他無益自 拔分段未免變易。灰身滅智非究竟樂。今菩薩不爾。非凡夫行非賢聖行。非凡夫者不同自受禪樂。非賢聖者不同自拔於苦。不同自受樂故即與他樂。不同自拔苦故即拔他 苦。亦是即拔苦是即與樂。即與樂亦即是拔苦。但分別說之誓願相對。前明拔苦後明 與樂爾。料簡福慧者。

問。觀音對智稱之而拔苦。普門對福見之而得樂何也。

答。智是光明正治闇惑。惑是生死苦惱。若治闇惑之苦。豈不用智解之光。故稱智慧人名即拔苦也。法是法門門名能通。通至涅槃安樂之處。初習此法是得樂因。後證此法是得樂果。故對此普門明其與樂也。

問。福慧相須本不相離。若定而無慧者此定名癡定。譬如盲兒騎瞎馬必墮坑落塹 而無疑也。若慧而無定者此慧名狂慧。譬如風中然燈搖颺。搖颺照物不了。故知福慧 相資二輪平等堪能運載也。若爾。何意以智慧拔苦福德與樂耶。

自有福德是智慧智慧是福德。自有福德非智慧智慧非福德。大小乘皆備四句。如 六度菩薩修般若。分閻浮提為七分。此是世智不能斷惑。此猶屬福德攝。即名此福是 智故。此智是福不斷惑故。若聲聞人智慧能斷若名智慧非福德。如餓羅漢也。若福德 非世智亦非出世智者。如白象也。若大乘四句者。別教地前三十心行行名福德慧行名 智慧。此慧不能破無明。此慧還屬福德攝。不破無明故。此福是智慧方便治取相故。 若地前皆名福德。地上皆名智慧。此智慧非福德福德非智慧。方等般若帶小明大。若 帶小福慧如前四句。明大福慧如向四句。今此普門名福慧者。福即是慧。慧即是福。 福慧不二。故大論云。如是尊妙人則能見般若。此慧那得無定。得首楞嚴定何曾無慧 。論云健相三昧能破彊敵。大經云。佛性者。有五種名。亦名般若亦名師子吼。亦名 首楞嚴亦名金剛佛性等即是定慧具足之名也。非禪不慧。非慧不禪。禪慧不二。不二 而二。分門別說作定慧二解。故釋論解般若明十八空。解禪定明百八三昧。此是二說 二即不二。料簡真應者。亦有四句之殊。非真非應。應而非真。真而非應。亦真亦應 。若非真非應。此就理可解。又就凡夫。不見理故非真無用故非應。此亦可解應而非 真者。外道亦得五通同他施化。通論亦得是應而不得名真。真而非應者。二乘人入真 斷結。灰身滅智不能起應。此亦是通論其真爾。亦真亦應者。此則別顯中道為真。即 真而論用為應真應不二。不二而二者故言真應爾。今依文互舉一往言其真應。前番問 答明真身常益。後番問答明應身間益。常間不得相離二鳥俱游。二往為論真身亦恒亦 不恒。應身亦間亦不間。若小乘明義。例如善吉石窟觀空見佛法身。蓮華尼則不見。 此豈非小乘中真身恒益不恒益義。丈六之應亦有見不見。此豈非應身有間有不間義。 大乘法身亦爾。於理為恒益於情為不恒益。應身亦爾。此緣滅彼緣興無有斷絕是不間 義。同質異見是其間義。而今分別。一往前問答屬恒益。後問答屬不恒益也。料簡藥 珠二身者。藥有差病拔苦之功。亦有全身增命致寶之用。故經云。若全身命便為已得 玩好之具也。如意珠王非但雨寶亦能除病。大施太子入海得珠還治父母眼。大品云。 若人眼痛珠著身上病即除愈故知通具二義。若別據一邊。約除患以譬藥證樂以況珠爾 。料簡冥顯兩益。凡有三十六句。料簡權實二智者。前問答實智照真而眾生得脫。權 智照假而眾生得度。度為度權亦度於實。脫為脫真亦脫於假。答此亦具四句。或因真 智解脫於權。七難消除二求願滿是也。或因真智解脫於實。三毒皆離是也。或因權智 得度於實。三十三身得度是也。或因權智得度於權。於怖畏急難之中得無畏是也。或 二俱度脫。或二俱不度不脫。今依文判互出一邊。前文脫權後文度實。料簡本迹者。 通論本迹俱能拔苦與樂。故壽量云。聞佛壽無量得清淨無漏無量之果報。即是從本得 樂。請觀音云。或遊戲地獄大悲代受苦。此是從迹拔苦。眾生不達本源後流轉苦惱。

若識本理即於苦而得解脫也。眾生若不見迹中施化。不能三業種福則無功德之因。焉致樂果。非本無以垂迹非迹無以顯本。前問答是明迹本。後問答是明本迹。

- 問。本迹與真應云何異。
- 答。真應就一世橫辯。如諸經所明。本迹就三世豎論。如壽量所說。料簡緣了者
  - 問。緣了既有性德善亦有性德惡否。
  - 答。具。
  - 問。闡提與佛斷何等善惡。
  - 答。闡提斷修善盡但性善在。佛斷修惡盡但性惡在。
  - 問。性德善惡何不可斷。
- 答。性之善惡但是善惡之法門。性不可改歷三世無誰能毀。復不可斷壞。譬如魔雖燒經何能令性善法門盡。縱令佛燒惡譜亦不能令惡法門盡。如秦焚典坑儒。豈能令善惡斷盡耶。
  - 問。闡提不斷性善還能令修善起。佛不斷性惡還令修惡起耶。

答。闡提既不達性善。以不達故還為善所染。修善得起廣治諸惡。佛雖不斷性惡 而能達於惡。以達惡故於惡自在。故不為惡所染修惡不得起。故佛永無復惡。以自在 故廣用諸惡法門化度眾生。終日用之終日不染。不染故不起。那得以闡提為例耶。若 闡提能達此善惡。則不復名為一闡提也。若依他人明闡提斷善盡為阿梨耶識所熏更能 起善。梨耶即是無記無明。善惡依持為一切種子。闡提不斷無明無記故還生善。佛斷 無記無明盡無所可熏故惡不復還生。若欲以惡化物。但作神通變現度眾生爾。問若佛 地斷惡盡作神通以惡化物者。此作意方能起惡。如人畫諸色像非是任運。如明鏡不動 色像自形。可是不可思議理能應惡。若作意者與外道何異。今明闡提不斷性德之善遇 緣善發。佛亦不斷性惡機緣所激慈力所熏。入阿鼻同一切惡事化眾生。以有性惡故名 不斷。無復修惡名不常。若修性俱盡則是斷不得為不斷不常。闡提亦爾。性善不斷還 生善根。如來性惡不斷還能起惡。雖起於惡而是解心無染。通達惡際即是實際。能以 五逆相而得解脫。亦不縛不脫行於非道通達佛道。闡提染而不達與此為異也。料簡智 斷者。此是一法異名不得相離。如人一體。何故從智拔苦從斷與樂。然而慧解之心稱 智。無縛礙身稱斷。譬如人被縛。運力屬智肅然附外屬斷運力屬心。故名智慧莊嚴。 附斷體散屬色身名福德莊嚴。今經文言說不得一時。故互舉智斷若深得此十義意者。 解一千從。廣釋觀世音普門義則不可盡也。第二別釋名者。為二。先明觀世音。次明 普門。以何因緣名觀世音。通釋如前。別者則以境智因緣故名觀世音。云何境智。境 智有二。一思議境智。二不思議境智。思議境智又二。一約理外。二約理內。理外為 四。一天然境智。只問此境為當由境故境由智故境。此智為當由智故智由境故智。若 由境故境此境是境。境即自生境。若智由智故智亦是自生智。自生名性自爾。非佛天

人所作。照與不照恒是境智。故名天然境智。二明相待者。若境不自境因智故境。智 不自智因境故智此即他生義。何故爾。境自生境既稱為自。以境望智。智即是他。今 境從智生豈非他境。智亦如是故名相待。次明因。緣境智者。若境不由智故境亦不由 境故境。智境因緣故境。智亦如是。此即境智因緣共生義。共生有二過墮自他性中。 次絕待明境智者。非境非智而說境智。此即離境離智無因緣而辯境智者。此是無因緣 絕待。從因緣尚不可得。何況無因緣。一往謂絕理而窮之不成絕待。並是理外行心妄 想推計。故中論云。諸法不自生。亦不從他生。不共不無因。是故說無生。那得如前 四種。計執是實餘妄語。性實之執見愛生著九十八使。苦集浩然流轉不息。云何執此 而生苦集。隨執一種境智謂以為是。隨順讚歎心則愛著而生歡喜。即是貪使。若人違 逆責毀心則忿怒而生瞋恚即是瞋使。貪恚既起豈非癡使。我解此境智他所不解以其所 執矜傲於人豈非慢使。既執此為是。今雖無疑後當大疑豈非疑使。我知解此法。法中 計我豈非身見。六十二見隨墮一邊豈非邊見。如此妄執不當道理豈非邪見。執此是實 計為涅槃豈非見取果盜。謂此為道依之進行豈非戒取因盜。十使宛然皆從所執境智上 起。將此歷三界四諦則有八十八使。就思惟歷三界則有九十八使。此則集諦結業顛倒 浩然。方招苦果生死不絕。於其境智不識苦集。何處有道滅。既不識四諦則破世間出 世間因果。無世出世法故無法寶。不識出世果無佛寶。不識出世因無僧寶賢聖之義。 一切俱失。若作如此執自生境智者。只是結構生死。增長結業過患甚多。若非理外境 智更將何等為理外耶。故大論云。凡夫三種語。見慢名字。聖人但一種語。名字。今 凡夫見慢取著謬用佛語。介爾取著乖理成諍。雖傍經論引證文字。如蟲蝕木偶得成字 。尋其內心實不能解是字非字。口言境智不解境智。以不解故如服甘露。則以境智起 見傷命早夭。故為龍樹所破。今不取此為境智以釋觀世音。自生境智既爾餘三句亦然 。二明思議理內境智者。亦作上四門。名字雖同觀智淳熟不生執見。畢故不造新成方 便道。發生煖頂乃至十六心眼智明覺。豁然得悟。破諸見惑與理相應。譬如盲人金[金 \*畀]抉膜灼然不謬。此之真觀名之為智。所照之理名之為境。以發無漏故稱理內境智 。雖見此理終是作意入真。故名思議境智也。今明觀世音亦不從此境智因緣得名也。

次明不思議境智者。若自他共無因等四句俱非境智者。今諸經論所明或從自生他生共生無因等。若不爾者。云何辯境智耶。

答。經中所明。皆是四悉檀赴緣假名字說。無四性執。若人樂聞自生境智。即說境是自境智是自智。以赴其欣欲之心。或時宜聞自境自智聞必生善。或時對治說自生境智。說必破惑。有時說此令即悟道。若無四悉檀益。諸佛如來不空說法。雖作四說無四種執。無執故無見愛。眾生聞者如快馬見鞭影。即破惑入道故名為智。此智所照名之為境。如是通達則識苦集道滅。三寶四諦宛然具足。若以智照境入空取證。成真諦理內思議境智。如前說。若不以果為證。知此境智但有名字名為境智。是字不在內外中間。是字不住亦不不住。是字無所有故。雖作四句明境智實不分別四句境智。雖

作四句聞境智實不得四句境智。雖體達四句境智實不作四句思量境智。言語道斷心行處滅。不可四句思惟圖度。故名不思議境智。金光明云。不思議智照不思議智境此具如大本玄義境智妙中廣說。龍樹先破一異時方然後釋如是我聞等義。今類此先破理外境智。後明不思議四悉檀。悉檀義如大本玄義。夫依名字為便。應先明觀智次辯世境之音。若解義為便。前明世境。次辯觀智。如先有境可得論觀。若未有境何所可觀。譬如境鼓後方映擊。今從義便。先明世音。後論觀智也。世者為三。一五陰世間。二眾生世間。三國土世間。既有實法即有假人。假實正成即有依報故名三種世間也。世是隔別即十法界之世亦是十種五陰。十種假名。十種依報。隔別不同故名為世也。間是間差。三十種世間差別不相謬亂。故名為間。各各有因各各有果。故名為法。各有界畔分齊。故名為界。今就一法界復有十法。所謂如是相性究竟等。十界即有各法。十界相互則有千法。如是等法皆是因緣生法。六道是惑因緣法四聖是解因緣法。大經云。無漏亦有因緣。因滅無明即是三菩提燈。是諸因緣法即是三諦。因緣所生法我說即是空。亦名為假名亦名中道義。故明十種法界三十種世間。即是所觀之境也。此境復為二。所謂自他。他者謂眾生佛。自者即心而具。如華嚴云。心如工畫師造種種五陰。一切世間中莫不由心造。

問。自他那得各具十法界。

答。觀身實相觀佛亦然。華嚴云。心然佛亦然。心佛及眾生是三無差別。豈不各 各具三諦境耶。音者即十法界口業之機也。界既不同音亦有異。問眾生各有三業何意 但觀音。然通論皆得。常念恭敬得離三毒即是觀世音。禮拜供養所求願滿即是觀世身 。而今但言觀世音者。舊釋此義為六。一趣立者。諸名不可累出舉一趣以標名。若稱 為觀世身者。已復還問此言。何意不名觀世音此則非問。二隨俗者。釋迦所說以音聲 為佛事。故言觀世音。若遊諸國土隨彼所宜。三互舉者。能觀所觀。所觀即眾生色心 也。今從能觀故但言觀。能聞所聞。能聞是聖人耳識。所聞是眾生音聲。今取所聞之 音聲。舉所聞得能聞。舉能觀得所觀。從此為名故言觀世音。舊問。能所既爾何不取 。所觀之色心能聞之耳識。以標名稱為聞色心菩薩耶。舊答云。菩薩一觀於色心此是 應廣。眾生之一音此是機狹。若從難者則機有兩字應但一字。便是應狹機廣故不如所 難。今更作難。此語應從義理那得逐字。菩薩以能觀色心。何意不能觀音聲。眾生何 意但以聲感色心不能感耶。若其俱感俱應此逐字為。觀則感應齊等若為判其廣狹。今 不作此明互舉凡聖感應皆通三業。而聖人與意凡夫與聲。故言觀世音爾。四義攝者。 如發聲必先假意氣觸脣口其音能出。口業若成則攝得身意。若觀於口業亦攝得身意。 觀餘不爾故言義攝。五隱顯者。身雖禮拜意雖存想。未知歸趣何等故名隱。若口音宣 暢事義則彰故名顯。舉顯沒隱故言觀世音。六難易者。臨危在厄。意則十念難成身則 拜跪遲鈍。口唱為急故成機。從易受名也。又第六為有緣。觀音昔為凡夫居茲忍界見 苦發誓。今生西方多還此土。既有誓緣急須稱名。今明。若如前六義皆遍有所舉。若 依釋論其義即圓。何以故。出入息是身行覺觀是口行受為心行。心覺觀故尚具三業。 何況發音成聲而不備三業耶。但舉一觀即備三應。但舉一音即備三機。而凡情謂聲彊 智利逐物標名。圓義往推悉皆具足。

# 觀音玄義卷上

## 觀音玄義卷下

#### 隋天台智者大師說 門人灌頂記

第二明觀者。又為二。一結束世音之境。二明能觀之智。結境即為六。一結十法 界是因緣境。二四諦境。三三諦境。四二諦境。五一實諦境。六無諦境。此具出大本 玄義。二明觀智者。傍境明智作五番明觀智。就因緣則四番因緣論觀。四諦亦有四番 論觀。三諦有兩番論觀。二諦有七番論觀。一實諦則一番論觀。無諦則無觀。如此等 義具在大本。今約三諦明觀。若通論十法界皆是因緣所生法。此因緣即空即假即中。 即空是真諦即假是俗諦即中是中道第一義諦。若別論六道界是因緣生法。二乘界是空 菩薩界是假佛界是中。論境即有二意。今對境明觀亦為二意。一次第三觀。二一心三 觀。次第者。如瓔珞云。從假入空名二諦觀。從空入假名平等觀。二觀為方便得入中 道第一義諦觀。此之三觀即是大品所明三智。一一切智。知一切內法內名一切能知能 解。一切外法外名能知能解。但不能用以一切道起一切種。故名一切智。二道種智。 能知一切道種差別則分別假名無謬。故名道種智。三一切種智。能於一種智知一切道 知一切種。一相寂滅相種種行類能知能解。名一切種智。通而為論觀智是其異名。別 而往目因時名觀果時名智。此三觀智即是大經四種十二因緣觀。下中上上上。涅槃通 取析法明於四觀。大品瓔珞直就摩訶衍但明三觀三智。今若開二經合涅槃者。應開衍 法從假入空觀生滅一切智也。若合涅槃就二經。合下中二觀同是一切智也。若將三經 若開若合對五眼者。天眼肉眼照麁細事皆是世智。悉為諸觀境本。若三觀三智從此即 入體法一切智。若四觀四智此即入析法一切智故肉眼天眼為本。若入一切智對慧眼。 道種智對法眼。一切種智對佛眼。中論偈因緣所生法一句為觀智之本。三句對三智。 若將三觀智對四教。即須開之如前。若將涅槃四觀對四教。下智是生滅一切智對三藏 教也。中智是體法一切智對通教也。上智即道種智對別教。上上智即一切種智對圓教 。所以應明三觀。那忽對四教者何。若無教即無觀。稟教修觀得成於智。所以明教也 。教必有主。有主即佛也。或可一佛說四教。或可示四相明四佛。四教既有四主即應 有四補處。即是四種菩薩輔佛弘此四教也。

若言諸法寂滅相不可以言宣。大經云。生生不可說乃至不生不生亦不可說。一教尚不可說云何有四。

答。理論實爾皆不可說。赴緣利物有因緣故亦可得說。非但生生可說乃至不生不生亦可說。以佛教門出生死苦。三藏教者。如釋論引迦旃延子明菩薩義。釋迦初為陶師值昔釋迦佛發願。從是已來始發菩薩心。即是行人所求菩提即名為法。深厭苦集欣求滅道。即起慈悲心誓度一切。行六度行。行願相扶拔苦與樂。所以者何。慳名為集墮餓鬼名苦。行檀名道慳息名滅。菩薩自伏慳貪悲心熏物。眾生稱名即能脫苦。自行檀施慈心熏物。物應可度即能示現令得安樂。當知為滿弘誓而修檀行也。乃至愚癡名

集生天名苦。修慧名道癡伏名滅。修慧度時自破苦集為成悲心以熏眾生。眾生稱名即得解脫。自證道滅以成慈心以熏眾生。眾生有感應機得度。故知行塡於願。行此六度各論時節。尸毘代鴿是檀滿。須摩提不妄語是尸滿。歌利王割截不動是忍滿。大施抒海是精進滿。尚闍梨坐禪是定滿。劬儐大臣分地是般若滿。如此修行至初僧祇劫。不知作佛不作佛。第二僧祇心知作佛口不言作佛。第三僧祇心知口言。過三僧祇已又百劫種相。百福凡用三千二百福修成。三十二大人相現時方稱菩薩摩訶薩。但伏惑何。如無脂肥羊。取世智為般若即此意也。用此菩薩行對聲聞行位者。初僧祇可對總別念處。二僧祇可對煖法。三僧祇可對頂法。百劫種相可對忍法。坐道場時可對世第一。三十四心斷結成佛。即對十六心發真乃至九解脫無學也。爾時坐道場上三十四心斷惑。正習俱盡名為三藏佛。所以釋迦精進弟子純熟。以精進故九劫前超八相成佛。此即是三藏教主所說教門。此中補處位在百劫。種相伏惑住最後身。六度行成誓願將滿。慈悲熏於眾生拔苦與樂。若就此辯者。但是因緣生法世智明觀。即是三藏教觀世音義也。

問。依三藏說釋迦彌勒同時發心。一超九劫。何意二佛俱成賢劫中佛耶。 答。釋迦值弗沙促百劫。彌勒值諸佛何必不促為九十一劫耶。

若爾則無百劫義。

答。任此法門則有百劫。以精進力傳超。通教者。如大品明。三乘之人同以第一 義諦無言說道。斷煩惱入涅槃。共緣一理用觀斷惑通也。亦名共般若教。此事與三藏 異。釋論破云。豈以不淨心修菩薩行。如毒器盛食。食則殺人。檀有上中下。謂捨財 身命也。勇士烈女亦能捨身。何得中捨名檀滿。中檀但名施非波羅蜜。不見能所財物 三事皆空非慳非施。此是真檀波羅蜜。乃至非愚非智無著空慧。名真般若不取世智。 論云若不信空一切皆違失。當知汝所修皆不與理相應。若信諸法空一切有所作。良以 空故能成一切諸法。故知若得空慧能具一切法也。又復菩薩無量劫修行。何但三阿僧 祇。如是等種種破三藏失。以顯摩訶衍中通教意也。大品云。菩薩發心與薩婆若相應 。此即觀真斷結與理相應也。發心已來即觀真斷結便稱菩薩。即是假人也。又觀真即 是法也。常與慈悲俱起。自斷苦集修道滅。亦以慈悲誓願斷一切眾生苦集與其道滅。 體達諸法如幻如化不生不滅。三事俱亡以行檀。乃至一切法無所著名般若。以此諸行 填願。即能破四住惑見第一義。則有三乘共十地。所謂乾慧乃至佛地。若將此十地來 對聲聞者。乾慧地對總別念處。性地對四善根位。八人地對八忍。見地對初果。薄地 對二果。離欲地對三果。已辦地對四果。支佛地自對支佛位。菩薩地自是出假方便。 道觀雙流斷正侵習佛地盡。故論云。是人煩惱盡習不盡。以誓扶習還生三界。利益眾 生淨佛國土。豈同三藏菩薩伏惑行六度行耶。此菩薩修行斷惑餘殘未盡。譬若微煙。 慈悲五道示現度物。眾生若稱名若感見。即能拔苦與樂解脫得度也。此是通教體假入 空觀。亦名一切智。即是通教觀世音義也。別教者別異通也。別明不共般若故言別也

。比教雖明中道。為鈍根人方便說中。次第顯理廣明歷劫修行。故大品云。有菩薩從 初發心遊戲神通淨佛國土。次第修習恒沙法門助顯中理。前却四住次破塵沙後破無明 。十信通伏諸惑而正伏四住。十住亦是通伏諸惑。而正斷四住成一切智。十行出假斷 無知。成道種智兼伏界外塵沙。十回向斷界外塵沙。成道種智正修中道伏無明。十地 斷無明見佛性。成一切種智。譬如燒金塵垢先去然後鎔金。次第斷結亦復如是。此菩 薩發心秉法慈悲修行。自斷無明成就真應。大誓慈悲熏於法界。眾生機感即拔苦與樂 。此是從空出假觀道種智。別教觀世音義也。圓教者。此正顯中道遮於二邊。非空非 假非內非外觀十法界眾生。如鏡中像水中月。不在內不在外。不可謂有不可謂無。畢 竟非實而三諦之理宛然具足。無前無後在一心中。即一而論三。即三而論一。觀智既 爾諦理亦然。一諦即三諦。三諦即一諦。大品云。有菩薩從初發心即坐道場轉法輪度 眾生。即於初心具觀三諦一切佛法。無緣慈悲於一心中具修萬行諸波羅蜜。入十信鐵 輪已能長別苦輪海。四住惑盡六根清淨名似解。進入十住銅輪初心即破無明。開發實 相三智現前。得如來一身無量身湛然應一切。即是開佛知見示悟入等。文云。正直捨 方便但說無上道。又云。今當為汝說最實事。即是圓教一實之諦三觀在一心中也。大 品云。若聞阿字門則解一切義。大經云。發心畢竟二不別如是二心前心難。是故敬禮 初發心。即是義也。此中知見但稱為佛知佛見。即是一切種智知佛眼見。佛眼見佛智 知。非不照了餘法。從勝受名。譬如眾流入海失本名字。大論云。十智入如實智無復 本名。但稱如實智。眼亦如是。五眼具足成菩提。而今但稱為佛眼。大經云。學大乘 者雖有肉眼名為佛眼。若例此語學小乘者。雖有慧眼名為肉眼也。若能如是解者名圓 教人法。約無作四諦起無緣慈悲。修不二定慧成真應二身。真遍法界藥珠普應一切。 橫竪逗機冥顯兩益。以無缺寶藏金剛般若。拔根本究竟解脫。以首楞嚴法界健相與三 點涅槃大自在樂。是名中道第一義諦觀一切種智。是名圓教觀世音義也。

問。此觀。觀眾生非空非有。云何行慈悲。

答。如淨名中說。

問。若觀十法界非空非假者。即是破一切因果耶。

答。若不明中道則不識非權非實。亦無權無實則無四番因果。若明中道則權實雙照。得有三種權四諦苦集因果三種道滅因果。乃至一實無作四諦世出世因果。宛然具足在一念心中。所以者何。以實相慧覺了諸法非空非有。故名為佛寶。所覺法性之理三諦具足。即是法寶。如此覺慧與理事和名僧寶。事和即有前三教賢聖僧。與理和即有圓教四十二賢聖僧。故大經月光增損而舉兩喻。前十五日約光論增。後十五日約光論減。而其月性實不偏圓。前後往望不無盈昃。月性圓者喻於實相。光明增減以喻智斷。智光增者即諸法不生而般若生。斷光減者即是諸法不滅而煩惱滅。大經亦稱無明為明。故知用譬邪光滅也。如是增減日日有之。如是智斷地地皆具。若十五日體圓光足。則月不更圓光不更盛。此喻中道理極菩提智滿。故云不生不生名大涅槃。若三十

日體盡光減究竟無餘。此喻無明已遣邪倒永除無惑可斷。故云不滅不滅名大涅槃。初三日月即喻三十心智斷。次十日月喻十地智斷。十四日月喻等覺智斷。十五日月喻妙覺智斷。仁王天王等般若以十四日譬十四般若。即此意也。如此明僧寶智斷皆約中道一實相法。一切因果無所破失也。若不明中道非空非假但計斷常等。即是破生滅四諦世出世因果。破三藏三寶。若但說無常生滅者。即破無生四諦通教三寶。若但說體法不生不滅真諦者。即破無量四諦別教三寶。若但說次第顯非空非假者。此亦破圓教無作四諦一體三寶。傳傳相望前所破失者多。後所破失者少。可以意得。

問。若圓修實相一法三諦一心三觀具足諸法。亦應一教四。詮稱於圓教即足。何 用四教如前分耶。

答。上開章云。次第三觀一心三觀。明教亦二。若一教圓詮一切諸法者赴利根人。若四教差別逗鈍根人。若不假漸次分別圓頓何由可解。用別顯圓故先明四教也。雖說種種道其實為一乘。又於如來餘深法中示教利喜。餘法即三方便引導弄引開空法道。若入佛慧方便無用。故云唯此一事實餘二則非真。故知但一圓頓之教一切種智中道正觀。唯此為實觀世音。餘皆方便說也。

復次若有所說若權若實悉是方便。非權非實言語道斷心行處滅不可說示。不生不 生妙悟契理方名為真。此亦無實可實。次明觀心者。夫心源本淨無為無數非一非二。 無色無相非偏非圓。雖復覺知亦無覺知。若念未念四運檢心畢竟叵得。豈可次第不次 第偏圓觀耶。猶如虛空等無有異。此之心性畢竟無心。有因緣時亦得明心。既有論心 即有方便正觀之義。譬如虛空亦有陰陽兩時。心亦如是。雖無偏圓亦論漸頓。若作次 第觀心者即是方便漸次意也。若觀心具有性德三諦性德三觀及一切法。無前無後無有 次第一念具足。十法界法千種性相因緣生法。即空即假即中。千種三諦無量無邊法一 心悉具足。此即不次第觀也。華嚴云。一切世間中無不從心造。心如工畫師造種種五 陰。若觀心空從心所造一切皆空。若觀心有從心所生一切皆有。心若定有不可令空。 心若定空不可令有。以不定空空則非空。以不定有有則非有。非空非有雙遮二邊。名 為中道。若觀心非空非有。則一切從心生法亦非空非有。如是等一切諸法在一心中。 若能如是觀心。名上上觀得諸佛菩提。淨名云。觀身實相觀佛亦然。觀身相既等於佛 觀心相亦等於佛。華嚴云。心佛及眾生是三無差別。當知觀此心源與如來等。若作餘 觀觀心皆是方便。名為邪觀。若作如此圓觀。名為真實正觀。即開佛知見坐如來座。 如此慈悲即是入如來室。安忍此法即是著如來衣。修此觀慧即是如來莊嚴。其人行住 坐臥皆應起塔。生如來想如此觀心名觀佛心也。第二明普門。即為二。一通途明門二 歷十義解釋。通六意者。一略列門名。二示門相。三明權實。四明普不普。五約四隨 。六明觀心。列門名者。通從世間。如人門戶通至貴賤居室。凡鄙以十惡五逆為門。 通至三途。清昇以五戒十善四禪四定等為門。通至人天。外道以斷常為門。通至惑苦 。愛以四倒為門。見以四句為門。善惡雖殊束而為言。俱是有漏世間之門。通至生死

爾。若就佛法論門亦復眾多。三藏四門通有餘無餘涅槃。通教四門近通化城遠通常住。別教四門漸通常住。圓教四門頓通常住。此則四四十六教門。又有十六觀門。合三十二門。能通之義分別其相在大本玄中。二示門相者。三藏四門所謂阿毘曇是有門。成實是空門。昆勒亦空亦有門。車匿非空非有門。一一廣明行法判賢聖位。由門通理。通教四門者。謂如幻之有。如幻之空。亦空亦有。非空非有。一一作行相判賢聖位。由門通理。別教四門。觀佛性如闇室瓶盆即有門。觀佛性如空迦毘羅城空即無門。觀佛性如石中金福人得寶罪人見石。是亦有亦無門。觀佛性離二邊即中道。非有非無門。一一作行相判位由門通理。圓教四門名不異別。但一門即三門。三門即一門。不一不四無歷別之殊。圓融不四之四。一一判不思議行位之相由門通理。此義皆在大本。次論諸門權實。三藏通教教觀。十六門能通所通皆是權。別教教觀能通是權所通是實。圓教教觀八門能通所通皆是實。具論在彼玄義。次明普不普者。若凡夫外道見愛等門尚不能通出三界。何況普耶。三藏通教雖通化城亦復非普。別教漸通亦非普義。唯圓教教觀實相法門能遍十法界。千性相三諦一時圓通。圓通中道雙照二諦。獨稱為普門也。

復次如淨名中說入不二門者。生死涅槃為二。不依生死不依涅槃。名為不二。亦 復非一。何以故。既除於二若復在一。一對不一還復成二。豈名不二耶。今不在二故 言不一不二。亦名不有不無。不有是破假。不無是破空。不有是破二。不無是破一。 若爾者。應存中道中道亦空。大經云。明與無明其性不二。不二之性即是中道。中道 既空於二邊此空亦空。故名空空空。名不可得空。是為入不二法門。即是圓教就空門 辯普門之意也。三十一菩薩各說不二門。文殊說無說為不二門。淨名杜口為不二門。 細尋彼文皆有四門義。肇師注云。諸菩薩歷言法相即有門。文殊言於無言此即空門。 思益云。一切法正一切法邪。亦是普門意。遊心法界如虛空。是亦空亦有門。淨名默 然即非空非有門。大品四十二字門先阿後茶中有四十字。皆具諸字功德。此亦是不二 普門。上方便品云。其智慧門難解難入。譬喻云。唯有一門而復狹小。眾經明實理門 者。悉普門意也。四隨觀心等悉在大本。二別釋普門者。至理非數赴緣利物。或作一 二之名。或至無量。廣略宜然且存中適十義一慈悲普。二弘誓普。三修行普。四斷惑 普。五入法門普。六神通普。七方便普。八說法普。九供養諸佛普。十成就眾生普。 上過途普門已約法竟。此十普門皆約修行福德莊嚴。前五章是自行。次三章是化他。 後二章結前兩意。自行中前四是修因後一是明果。修因又二。初二是願。後二是行。 總生起者。菩薩見一切苦惱眾生起大慈悲。此心雖不即是菩提心能發生菩提心。譬如 地水雖非種子能令芽生。今因大悲起菩提心亦復如是。次誓願者。若但慈悲喜多退墮 。魚子菴羅華菩薩初發心三事。因時多及其成就少。以不定故。須起誓願要期制持此 心。即菩提堅固。次明修行者。若但發願於他未益。如無財物勢力權謀不能拔難。菩 薩亦爾。須福德財神通力智慧謀。乃可化道。大經云。先以定動後以慧拔。修行塡願 意在此也。次斷惑者。成論人無礙道伏解脫道斷。若然者。修行是伏道為因。斷惑是 解脫道為果。若毘曇明無礙道一念即斷。那得容與七覺而有伏惑之義。以方便道伏無 礙道斷解脫道證。引釋論云。無礙道中行名菩薩。解脫道中行名佛。此約究竟為語。 佛證三菩提。名解脫道也。若然者。修行是方便道。斷惑是無礙道。入法門是解脫道 。取此自行次第也。次神通者。若欲化他示三密。神通是示色身。方便示意同情。說 法是示口隨其類音。此是化他次第也。供養諸佛結自行。非但華香四事是供養。隨順 修行是法供養。於供養中最。大經云。汝隨我語即供養佛。稟教而行是結自行也。成 就眾生是結化他。菩薩四威儀中尚不忘眾生。何況入諸法門淨佛國土。皆為饒益一切 眾生。故一句結化他也。次解釋者。始從人天乃至上地皆有慈悲。此語乃通不出眾生 法緣無緣。若緣眾生眾生差別假名不同。因果苦樂有異。尚不得入於法緣之慈。何得 稱普耶。若法緣無人無我無眾生。從假以入空尚不得諸假名。何況是普。若無緣慈者 。不緣二十五有假名。不緣二乘涅槃之法。不緣此二邊。雖無所緣。而能雙照空假。 約此起慈名無緣慈。心通三諦稱之為普也。別釋者。若修眾生緣慈者。觀一法界眾生 假名。可不名普。今觀十法界眾生假名。一一界各有十種性相本末究竟等。十法界交 互即有百法界千種性相。冥伏在心雖不現前宛然具足。譬如人面備休否相。庸人不知 相師善識。今眾生性相一心具足。亦復如是。凡人多顛倒少不顛倒理具情迷。聖人知 覺即識如彼相師。知此千種性相皆是因緣生法。若是惡因緣生法。即有苦性相乃至苦 本末。既未解脫。觀此苦而起大悲。若觀善因緣生法。即有樂性相乃至樂本末。觀此 而起大慈。具解如大本。今約初後兩界中間可解。地獄界如是性者。性名不改。如竹 中有火性。若其無者。不應從竹求火從地求水從扇求風。心有地獄界性亦復如是。地 獄相者。攬而可別名之為相。善觀心者即識地獄之相。如善相師別相無謬。故名相也 。體者以心為體。心覺苦樂故以當體。譬如釵鐺環釧之殊。終以銀為體質。六道之色 乃異只是約心。故心為體也。乃至運御名力。緣山入火皆是其力也。作者為動曰作。 已能有力即有所作。或作善作惡也。因者業是因也。緣者假藉為緣也。如愛潤業因緣 合也。果者習果也。如地獄人前世多淫。生地獄中還約多淫見可愛境。即往親附名習 果也。報者報果也。昔有淫罪今墮地獄受燒炙之苦。名報果也。本者性德法也。末者 修得法也。究竟等者攬修得即等有性德。攬性德即具有修得。初後相在故言等也。地 獄界十相性既如此。餘九亦然。

問。當界有十性相可然。云何交互相有。餘界交互已難可信。云何地獄有佛性相 本末耶。

答。大經云。夫有心者皆當得三菩提。如仙豫殺婆羅門即有三念。又婆藪地獄人好高剛柔等義。雖在地獄佛性之理究竟不失。故知地獄界即有佛性。佛相者即是性德之相也。淨名經云。一切眾生即菩提相。聖人鑑之冷然可別也。體者即是地獄界心實相理也。力者法性十力變通大用也。作者從無住本立一切法。如師子筋師子乳也。因

者正因也。緣者性德緣了也。果即般若菩提大果也。報即大涅槃果果也。本即性德。末即修得。等者修得相貌在性德中。性德中亦具修得相貌。故言究竟等也。大經云。雪山之中有妙藥王亦有毒草。地獄一界尚具佛果性相十法。何況餘界耶。地獄互有九界。餘界互有亦如是。菩薩深觀十法界眾生。千種性相具在一心。遠討根源照其性德之惡性德之善。尚自冷然。何況不照修得善惡耶。如見雪山藥王毒草。以觀性德惡毒惻愴憐愍。起大悲心欲拔其苦。以觀性德善樂愛念歡喜。起大慈心欲與其樂。此十法界收一切眾生罄無不盡。緣此眾生假名修慈。豈非眾生慈普耶。

問。地獄界重苦未拔。云何言與樂耶。

答。眾生入地獄時多起三念。菩薩承機即與樂因。故言與樂也。又菩薩能大悲代 受苦。令其休息。餘界苦輕與樂義可解。二法緣慈者。觀十法界性相一切善惡悉皆虛 空。十法界假名假名皆空。十法界色受想行識行識皆空。十法界處所處所皆空。無我 無我所皆不可得。如幻如化無有真實。常寂滅相終歸於空。眾生云何彊計為實。良以 眾生不覺不知為苦為惱。不得無為寂滅之樂。拔其此苦而起大悲。欲與其此樂故起大 慈。淨名云。能為眾生說如此法。即真實慈也。若緣一法界法起慈者可不名普。今緣 十法界法豈非普耶。是名法緣慈普也。三無緣慈者。若緣十法界性相等差別假名。此 假則非假。十法界如幻如化空則非空。非假故不緣十法界性相。非空故不緣十法界之 真。既遮此二邊無住無著。名為中道。亦無中可緣畢竟清淨。如是觀時雖不緣於空假 。任運雙照二邊。起無緣慈悲拔二死之苦。與中道之樂。如磁石吸鐵。無有教者自然 相應。無緣慈悲吸三諦機更無差忒。不須作念故言無緣慈悲也。行者始於凡地修此慈 悲。即得入於五品弟子。觀行無緣慈悲。進入十信位相似無緣慈悲入於十住。方是分 證無緣慈悲。乃至等覺隣極慈悲熏眾生。不動如明鏡。無念如磁石任運吸鐵。故名無 緣慈悲。三諦具足名之為普。通至中道故稱為門也。二弘誓普者。弘名為廣。誓名為 制。願名要求。是故制御其心廣求勝法。故名弘誓也。弘誓本成慈悲。慈悲既緣苦樂 弘誓亦約四諦。若見苦諦逼迫楚毒辛酸。緣此起誓故言未度令度也。若見集諦顛倒流 轉迷惑繫縛。生死浩然而無涯畔。甚可哀傷約此起誓故言未解令解也。清淨之道眾生 不識。行此道者能出生死至安樂地。欲示眾生立於此道。故言未安令安。滅煩惱處名 為涅槃。子果縛斷獲二涅槃。約此起誓故云未得涅槃令得涅槃。生死因難識苦果易知 。故先果後因。涅槃理妙須方便善。故先因後果。大經云。不解鑽搖漿猶難得況復生 酥醍醐。如此四意但一往。只迷心起業業即感果。欲識果源知果因集。制心息業則生 死輪壞。煩惱調伏名之為道。修行不懈苦忍明發。子果俱斷證盡無生。名之為滅。雖 有四別終是一念。更非異法。四諦既爾弘誓亦然。次明普不普者。若凡夫既厭下攀上 。約此立誓是不名普。二乘見三界火宅畏此修道。此乃見分段四諦亦不名普。若別教 先約分段次約變易此亦非普。若圓教菩薩於一心中照一切苦集滅道。遍知凡夫見愛即 有作之集。二乘著空即無作之集。故淨名云。法名無染。若染於法。是名染法。非求

法也。又云。結習未盡華則著身。即是變易之惑全未除也。大經云。汝諸比丘於此大 乘未為正法除諸結使。即無作集也。乃至順道法愛生亦是無作集也。是名遍知集。遍 知苦者。以有集故即能招苦報。有作之集招分段苦。無作之集招變易苦。即知苦諦也 。遍知對治苦集之道滅。從五戒十善不動不出。二乘四諦十二因緣。通至有餘無餘涅 槃。通教亦爾。別教歷別通至常住。不能於一道有無量道。不名普道。圓教中道即是 實相。普賢觀云。大乘因者諸法實相。修如此道名為圓因稱為普道。故所得涅槃即是 究竟常住。一切煩惱永無遺餘。譬如劫火無復遺燼。故名普滅。所觀四諦既周。緣諦 起誓何得不遍。故稱弘誓普也。私用觀十法界性德修得善惡。而起弘誓論普不普。自 是一節大義。與四諦語異故逭用之亦應善也。三明修行普。先明次第修行。次明不次 第修行。具在大本行妙中。四明斷惑普者。若從假入空止斷四住惑。華猶著身。未為 正法除諸結使。但離虛妄非一切解脫。若從空入假止除塵沙。不依根本而斷亦不名普 。若空假不二正觀中道。根本既傾枝條自去。如覆大地草木悉碎。故名斷惑普也。五 入法門普者。二乘若入一法門不能入二。何況眾多。若修歷別之行階差淺深。我唯知 此一法門餘不能知者。此亦非普。若入王三昧一切悉入其中。譬如王來必有營從。營 從復有營從。王三昧亦如是。入此三昧一切三昧悉入其中。所謂三諦三昧。三諦三昧 復有無量法門而為眷屬。亦皆悉入王三昧中。故名入法門普。六神通普者。若大羅漢 天眼見大千。支佛見百佛土。菩薩見恒沙佛土。皆是限量之通故不名普。何以故。緣 境既狹發通亦小。今圓教菩薩緣十法界境發通。遍見十法界而無限極。三乘尚不知其 名。何況見其境界。眼見既爾餘例可知。神通妙中當廣說。七方便普者。進行方便是 道前方便。起用方便是道後方便。今正明道後方便也。若二乘及小菩薩所行方便入一 法門。若欲化他齊其所得起用化物。道前道後俱非是普。圓教菩薩二諦為方便。收得 一切方便。入中道已雙照二諦。二諦神變遍十法界。而於法身無所損減。道前道後皆 名為普。八說法普者。二乘小菩薩說法不能一時遍答眾聲。又殊方異俗不能令其俱解 。大經云。拘絺羅於聲聞中四無礙辯為最第一。非謂菩薩也。今圓教人一音演法。隨 類得解。以一妙音遍滿十方界。如修羅琴隨人意出聲。故名說法。說法妙中廣說。九 供養諸佛普者。就此為二。一事二理。華嚴云。不為供養一佛一國土微塵佛。乃至為 供養不可說不可說佛。能不起滅定現諸威儀。安禪合掌讚諸法王。以身命財一切供具 。周至十方。譬如雲雨供養諸佛也。理解者。圓智正觀之心名為覺。覺即是佛義。萬 行功德熏修此智此智名一切。修功德資供此智。即是供養一切智。淨名云。以一食施 一切。故云供養諸佛普。十成就眾生普者。譬螢火燈燭星月為益蓋微。日光照世。一 切卉木叢林遍令生長華果成就。外道如螢火二乘如燈燭。通教如星別教如月。成就義 約。今圓教聖人慈慧饒潤。冥顯兩益而無限量。華嚴云。菩薩不為一眾生一國土一方 眾生發菩提心。乃為不可說不可說佛剎微塵國土眾生發心。成立利益一時等潤。譬如 大雨一切四方俱下。故名成就眾生普。普門之義何量何邊豈可窮盡。如淨名之儔不能 受持。今此觀世音普門即對三號。觀即是覺。覺名為佛。世音是境。境即是如。普門即正遍知。此之三義不可窮盡。若見其意則自在說也。私就普門品搜十普之義。證成此者。若如觀音愍諸四眾受其瓔珞者。諸是不一之名。愍是悲傷之義。此即慈悲普。有慈悲任運有弘誓普義也。以種種形遊諸國土度脫眾生。即是淨佛國土。豈非修行普。自既無縛能解他縛。自既無毒令他離毒。一時稱名皆得解脫。皆是偏悉之言豈非斷惑普。普門示現即是入法門普。方便之力即是方便普。神通力者即神通普。而為說法即說法普。多所饒益即成就眾生普。分作二分奉二如來即供養諸佛普。如是義意悉在經文。故引以為證也。第二釋體者。以靈智合法身為體。若餘經明三身者。則單是公之。故引以為證也。第二釋體者。以靈智合法身為體。若餘經明三身者。則單是法身為體。此品但有二身義。故用理智合為體也。只此智即實相理。何以故。若無靈智實相隱。名如來藏。今知權實相與理不二。如左右之名爾。若明實相體義。廣出大文素,第三明宗者。以感應為宗。十界之機扣寂照之知。致有前後感應之益。益文雖廣直將感應往收。如牽綱目動。所以用感應為宗。餘經或用因果為宗。今品不爾者。因果語通從凡乃至上地。各有因果。能感所感既皆有因果。但經文意似不至此。機家雖有因果但以感為名。聖雖無因果但以應為名。則扶文義便也。感應義有六。一列名。二釋相。三釋同異。四明相對。五明普不普。六辯觀心。具在大本。

問。若言機者。是微善之將生。惡微將生亦是機不。

答。然。

問。機為是善為不善。若已是善何須感聖。若未是善那得言善之將生。

答。性善冥伏如蓮華在泥。聖人若應如日照則出。

又問。若言機是關者。為善關不善關。若已是善何須關聖而成善。若非是善復何 得關聖而成非善。凡聖條然何曾相關。

答。善關於大慈惡關於大悲。故言相關。

問。若言宜釋機者。此乃是應家觀機用與之言。那釋感義。

答。圓蓋圓底互得相宜。

問。為用法身應為用應身應。應身無常此則無應。法身若應此則非法身。

答。法既言身何不言應。應身既稱應何意不應。故俱應。

又問。感應為一為異。若一感即是應凡便是聖。若異則不相關。

答。不一不異而論感應。

問。感應為虛為實。若是實者凡夫是實。實則何可化。若言是虛虛何所化。

答。云云。以他。

問。聖人是所感凡夫是能感。聖人是能應凡夫是所應。所感非是感所應非是應。 云何言感應道交。

答。所感實無感從感名所感。言聖人是所感。所應實無應。從應名所應。言凡夫是所應。還是感所為應能。應能為感所。亦是應所為感能。感能為應所。既無感應之

實。亦無感應之異。不異而異者。聖沒所感目為能應。凡沒所應目為能感。故言感應道交。私難此語。若實無感應之異。今聖沒能感凡沒能應。何不聖沒能應凡沒能感。若如此則無凡聖之殊。若不如此感應便異何言不異。又感能無感能之實。而名感能者何不名應能。若應所無實何不名感所。若爾則無凡聖感應。若不爾則是異云何不異。又難。若以感能為應所感所為應能。此是自生義。若能應只是所應能感只是所感。還是自生義。若應能生應所感能生感所。能感生所感所感生能感。能應生所應所應生能應。皆是從他生。豈非他性義。若共生則二過。若離二墮無因過。

問。若爾則無感應。

答。聖人以平等無住法不住感。以四悉檀隨機應爾。

問。妄執之善能感不。

答。妄執是惡亦得感。

問。妄執既非一應亦為二。

答。應本無二為緣何所不作。

問。凡名凡僻。善則招樂惡則感苦。聖名為正。正則非善非惡非苦非樂。善惡之 僻何能感非善非惡之正耶。

答。正聖慈悲拔其善惡之僻。令入非善非惡之正。故有感應。

第四慈悲利物為用者。二智不當用耶。

答。二智語通今別附文。以盛明隱顯之益。故以此當用爾。他釋。法身冥益為常。應身暫出還沒為無常。今明。法身常寂而恒照此理宜然。應身處處利益未甞休廢亦是常義。若言有應不應以為無常者。法身亦有益無益故知俱是常無常俱有冥顯。如日月共照一虧一盈。如來恒以常無常二法熏修眾生。故言二鳥雙遊。而呼為常無常爾。譬如種植或假外日風雨內有土氣煖潤。而萬物得增冥顯兩益亦復如是。此中應用王三昧十番破二十五有。以辯慈悲益物之用。具在大本玄中。

問。觀音利物廣大如此。為已成佛。猶是菩薩。

答。本地難知而經有兩說。如觀音受記經明。觀音勢至得如幻三昧。周旋往返十方化物。昔於金光師子遊戲如來國王名威德。化生二子。左名寶意即是觀音。右名寶尚即是勢至。往問佛何供養勝。佛言。當發菩提心。從如來初發菩提心。次阿彌陀佛後當成正覺。觀音名普光功德山王。勢至名善住功德寶王。又如來藏經亦云。觀音文殊皆未成佛。若觀音三昧經云。先已成佛號正法明如來。釋迦為彼佛作苦行弟子。二文相乖此言云何。乃是四悉檀化物。不可求其實也。第五明教相者。夫觀音經部黨甚多。或請觀世音。觀音受記觀音三昧。觀音懺悔。大悲雄猛觀世音等不同。今所傳者即是一千五百三十言法華之一品。而別傳者。乃是曇摩羅讖法師亦號伊波勒菩薩。遊化葱嶺來至河西。河西王沮渠蒙遜歸命正法。兼有疾患以告法師。師云。觀世音與此土有緣。乃令誦念患苦即除。因是別傅一品流通部外也。此品是法華流通分。既通於

開權顯實之教。令冥顯兩益被於將來。以十法界身圓應一切。使得解脫。圓人秉於圓法流通此圓教故。即是流通圓教相也。五味為論即是流通醍醐味也。

問。文云。方便之力種種不同。說亦應異。何得是圓教相。

答。就能說之人為圓。弘圓教遍逗法界之機。機雖不同不可令能秉法人隨機而遍。例如佛於一乘分別說三。豈可令佛便是聲聞緣覺耶。又付囑云。若人深信解者為說此經。若不信者於餘深法中示教利喜。既奉佛旨圓逗萬機。種種不同只是流通圓教。又問。能說人圓於教亦圓。行人機異此人稟何教耶。若稟偏教與鹿苑人同若稟圓教機亦應。一答昔鹿苑佛未發本顯迹。不會三歸一。人法未圓。所稟方便不得稱圓。今經已開顯權實。雖是種種身本迹不思議一。雖說種種法為開圓道。於義無咎。

問。上文云正直捨方便。此中那言以方便。

答。上正顯實故言其捨。此中論用故言示現。體用不思議一也。

## 觀音玄義卷下